

辨法法性論

彌勒菩薩 造論
法尊法師 翻譯
太虛大師 科題

序論

由知何永斷，有餘所應證；欲辨彼等相，故我造此論。

正論

一 辨法法性通明三乘義

甲 略標

1 總攝二事

當知此一切，略攝爲二種：由法與法性，盡攝一切故。
其中法所顯，即是說生死；其法性所顯，即三乘涅槃。

2 別說三門

（一）相門

此中法相者，謂虛妄分別，現二及名言。實無而現故，以是爲虛妄；彼一切無義，惟計故分別。
復此法性相，無能取所取，能詮所詮別，即是真如性。

（二）成立門

無而現故亂，即是雜染因，如現幻象等，非有而現故。
若無及現中，任隨一非有，則亂與不亂，染淨皆非理。

（三）不一不異門

此二非即一，亦復非別異；以彼有無事，有別無別故。

乙 廣釋

1 辨生死

(一) 標列

由六相悟入，諸法爲無上：謂相與成立，及非一非異，所依共不共，悟入能所取，現似而非有。

(二) 別釋

(1) 略指前三

其中相成立，及非一非異，如略標中說。

(2) 所依共與不共

諸於何流轉，說彼爲所依？謂情界器界。器界即爲共，如共同所了。

有情界有共，復有諸不共：

托胎生、名言，攝受與治罰，饒益及違害，功德并過失：由更互增上，互爲因故共。

依及諸了別，苦、樂、業、死、生，繫縛與解脫，彼九不共故，名不共所依。

(3) 悟入二取似現非有

共現外所取，實即能取識。以離其內識，外境義非有，是共同性故。

於餘不共識，爲所取等義，謂他心等法。

諸能取識前，更互非境故；於非等引時，自分別現故；於諸等引前，三摩地行境，現彼影像故。

以所取若無，亦無似能取。由此亦成立，無似能所取。

然由無始來，等起而成立，二取悉非有，亦善成立故。

2 辨涅槃

(一) 標列

由六相悟入，法性爲無上：謂相、與依處，抉擇、及觸證，隨念、并悟入，到達彼自性。

(二) 別釋

(1) 相

相如略標說。

(2) 依處

處謂一切法，及一切經等。

(3) 抉擇

其中抉擇者，謂依大乘經，如理作意攝，一切加行道。

(4) 觸證

觸爲得正見，故以真見道，現前得真如，所以親領受。

(5) 隨念

隨念謂修道，爲除諸垢故，於前所見義，菩提分所攝。

(6) 到達自性

悟達彼自性，謂真如無垢，一切唯真如；顯現彼即是，轉依圓成實。

二 特詳轉依別彰大乘義

甲 法說

1 總標

由十相悟入，轉依爲無上：入性、物、數取，別、所爲、依住，作意及加行，過患并功德。

2 別釋

(一) 悟入自性

其悟入自性：謂客塵諸垢，及與真如性；不現及現義，即無垢真如。

(二) 悟入物體

謂共器界識，真如性轉依；及契經法界，真如性轉依；并諸非所共，有情界內識，真如性轉依。

(三) 悟入數取趣

初二謂諸佛，及諸菩薩眾，真如性轉依；後亦通聲聞，及諸獨覺者。

(四) 悟入差別

悟入差別者：謂諸佛菩薩，嚴淨土差別，及得智法身，報身、并化身，能普見、教授，自在成差別。

(五) 悟入所為

悟入所爲者：謂宿願差別；宣說大乘法，即所緣差別；十地加行別。

(六) 悟入所依住

(1) 標列

悟入所依住，謂由六種相，入無分別智：即悟入所緣，離相、正加行，性相、與勝利，及悟入遍知。

(2) 別釋

(甲) 悟入無分別智所緣

當知有四相，初悟入所緣：謂於大乘法，說、勝解、決定，及圓滿資糧。

(乙) 悟入無分別智離相

第二能悟入，離相亦四種：謂由離所治，能治、及真如，並能證智相。此四如次第，即所永遠離，粗、中、與微細，及常隨逐相。

(丙) 悟入無分別智加行

悟入正加行，亦有四種相：謂有得加行，及無得加行，有得無得行，無得有得行。

(丁) 悟入無分別智性相

悟入於性相，當知由三種：

謂由住法性，依住無二取，離言法性故。

第二由無現，二取及言說，根、境、識、器世，悉皆不見故。

以是此即明：無所觀、無對，無住、無所現，無了、無依處，無分別智相。

如經所宣說：由現一切法，見如虛空故；及一切諸行，見如幻等故。

(戊) 悟入無分別智勝利

悟入勝利四：得圓滿法身，得無上安樂，得知見自在，得說法自在。

(己) 悟入無分別智遍知

I 標列

悟入遍知者，當知有四相：謂對治遍知，及自相遍知，諸差別遍知，五作業遍知。

II 別釋

(I) 對治遍知

其對治遍知，謂無分別智，對治五妄執：即妄執有法、數取趣、變壞，異、及損減性。

(II) 自相遍知

自相遍知者：遠離不作意，超尋伺、寂靜，自性、執息念，五種為自相。

(III) 差別遍知

差別遍知者，謂不分別性，及非少分性，無住與畢竟，並其無上相，是五種差別。

(IV) 作業遍知

最後業遍知：謂離諸分別；給無上安樂；令遠離煩惱，無所知二障。其後所得智，而能正悟入，一切所知相，嚴淨諸佛土，成熟諸有情；並能令生起，一切相智性。五種業差別。

(七) 悟入作意

悟入作意者，謂若諸菩薩，發心欲悟入，無分別智者，當作如是我：由不知真如，起虛妄分別，名曰一切種，為現二取因，依此起異識；故彼因及果，雖現而實無，彼現法性隱，彼沒法性現。若如是作意，菩薩即能入，無分別正智。

從緣知唯識，觀識不得境；由境無得故，亦不得唯識。由此無得故，入二取無別，二別無所得，即無分別智。無境無所得，以是一切相，無得所顯故。

(八) 悟入地

加行悟入地，於四相當知：

由勝解加行，於勝解行地，是順抉擇位。

各別證加行，即於初地中，是觸真實位。

由修習加行，於未淨六地，及三清淨地，是為隨念位。

由究竟加行，任運佛事業，相續不斷故，此即是達到，彼智體性位。

(九) 悟入過患

悟入過患者，謂若無轉依，有四種過患：

無斷惑依過；

無修道依過；

無諸涅槃者，施設依處過；

三菩提差別，施設無依過。

(十) 悟入功德

當知彼相違，四相入功德。

乙 喻說

於無而現有，喻如夢、幻等。轉依則喻如：虛空、金、水等。